

六藝之一錄

百四八



欽定四庫全書

六藝之一錄卷三百四十八

錢唐倪濤撰

歷朝書譜

宋

虞允文

虞允文字彬甫隆州仁壽人六歲能九經七歲能屬文紹興二十三年登進士第高宗召對除秘書丞乾道五年拜右僕射同中書門下平章事兼樞密使

封雍國公謚忠肅

宋史

停雲館帖第六卷為南宋名人書如虞雍公之儼雅

皆有可取

奔州山人藁

跋虞雍公鈞堂帖

虞忠肅公采石之戰日星晦蒙江水震蕩功烈赫然  
疑其平日為人有喑啞叱咤千人皆廢之狀及觀其  
手帖詞語詳雅氣象雍容乃真一書生耳公之子孫  
居吳中者世藏此帖今為葑門朱性甫得之夫性甫

雖好文事藏此吾固知其意不在筆墨間也

鮑翁家藏集

劉珙

劉珙字共父崇安人子羽長子生有奇質從季父子  
暈學登進士乙科授禮部郎官遷中書舍人參知政  
事進資政殿大學士淳熙二年移知建康府江東安

撫使謚忠肅

宋史

朱文公云余少時曾學曹操表時劉共父方學顏書  
鹿脯帖余以字畫古今誚之共父謂我所學者唐之

忠臣公所學者漢之篡賊耳予默然亡以應

朱子文集

### 周利建

利建進士擢第贈太師秦國公

陸游周必大墓志

周必大云先君秦國公平生喜學蔡忠惠公書家藏

京師舊石刻兩卷真行草畢備妙絕一世詛楚文待

制董公守汾日辨證刻石先君實為書丹

平園集

### 周必大

周必大子充一字洪道紹興二十年第進士又中

博學宏辭科歷秘書省正字兼國史院編修官淳熙十四年拜右丞相進左丞相少保益國公贈太師謚文忠自號平園老叟

宋史

道林寺堂之顏吾鄉益國周公書之

文文山集

周益公退傅帖

益公之字端重謹密如其為人此猶中年之作也每觀退傅帖無異往昔此其常德尤可嘆服於此又識前輩後進愛敬兩盡其道足為世之法矣

王魯齋集

周平園艾軒神道碑

題跋已見

周必正

周必正字子中蔭補迪功郎貢至禮部調袁州司戶

參軍孝宗召對便殿改知建昌軍南豐縣歷軍器監

丞知舒州善屬文尤長於詩書有古法四方豐碑巨

扁多出其筆

渭南集

周必大曰季兄子中筆法絕高

平園集

胡銓



胡銓字邦衡廬陵人建炎二年高宗策士淮海銓策  
萬餘言高宗見而異之將冠之多士有忌其直者移  
置第五乾道初為工部侍郎七年以資政殿學士致

仕謚忠簡

宋史

文天祥道山堂瞻御書詩云著庭更有邦人筆稽首  
承休學二忠自注云著作之庭乃胡忠簡公書周文

忠公立

文山集

胡侍郎大書著作之庭其形模濫觴發於小篆豈八

分未出已有此書

林光朝  
艾軒集

胡忠簡公翰墨甚佳阜陵嘗問公曰卿寫字宛如卿  
為人公答曰臣幼習顏真卿字今自成一家又曰朕  
前日侍太上於德壽宮閣上治疊書畫因得卿紹興  
戊午所上封書真本太上與朕玩味久之喜卿辭意  
精切筆法老成英風義氣凜然飛動太上自藏之曰  
可為後代式但其後為秦檜之所批抹汙者朕啓太  
上令工逐行裁去裝褙公封事藁有周益公楊誠齋

二公題跋在後公孫搢廣西僉憲刻於融州真仙巖

珊瑚網

呂祖謙

呂祖謙字伯恭居婺州中進士後中博學宏詞科除  
太學博士國史院編修官先是書肆有書曰聖宋文  
海孝宗命祖謙類為百五十卷上之賜名皇朝文鑑

除著作郎謚曰成

宋史

呂伯恭能書大字

朱子文集

洪适

洪适字景伯鄱陽人紹興十三年中博學宏詞科乾道元年拜尚書右僕射同中書門下平章事謚文惠

宋史

洪适取古今石刻法其字為之韻辨其文為之釋以

辨隸書曰隸釋隸續

中興藝文志

鵲山寺有雄跨堂頗雄偉洪景伯書

周必大乾道庚寅奏事錄

陳康伯

陳康伯字長卿信之弋陽人宣和三年中上舍丙科  
孝宗時封信國公拜尚書左僕射同中書平章事謚

文正

宋史

康伯工筆札其蹟見鳳墅續法帖中

書史會要

王淮

王淮字季海婺州金華人幼穎悟力學屬文登紹興  
十五年進士第淳熙中拜右丞相兼樞密使謚文定

宋史

宋名賢遺墨帖有王淮劄子

弁州山人藁

王季海上恩

過厚劄子行書

式古堂書畫彙考

范成大

范成大字至能吳郡人紹興二十四年擢進士第孝

宗時拜參知政事進資政殿學士領洞霄宮加大

學士素有文名尤工於詩自號石湖

宋史

石湖以能書稱宗黃庭堅米芾道勁可觀

書史會要

范石湖書田園雜興卷

右范文穆田園雜興絕句六十首公好紀事帥廣右  
有桂海虞衡志帥蜀有吳船錄此益罷金陵間以大  
資領洞霄宮歸隱石湖時作即詩無論竹枝鷓鴣家  
言已曲盡吳中農圃故事矣書法出入眉山豫章間  
有米顛筆圓熟道麗生意鬱然真足二絕余不敏  
何敢望公然視公掛冠幸尚少息黔補劓之暇安知  
不能為公增一段吳語邪因識其末以俟

弇州山人藁

汪應辰

汪應辰字聖錫信州玉山人紹興五年進士第一人

授鎮東軍僉判召為秘書省正字上書謂和議不諧

非所患秦檜大不悅出通判建州檜死召為吏部郎

官遷權吏部尚書以端明殿學士知平江府

宋史

周必大曰玉山汪公名重天下人得尺牘榮之與余

通問皆季路代作當時翰墨已難得

平園集

汪達

汪達應辰子登進士第仕至吏部尚書端明殿學士



宋史汪  
應辰傳

汪季路建集古堂藏奇書秘蹟金石遺文二千卷著

淳化帖辨記十卷

紫桃軒  
雜綴

王庭珪

王庭珪安福人政和間進士調茶陵丞忤部使者遂

拂衣歸孝宗初除國子主簿乾道間召對內殿賜坐

勞問除直敷文閣所著有瀘溪集

鐵網  
珊瑚

王瀘溪先生手書十簡雖紙敝墨渝而此老正氣勃

勃可挹 寓意編

王十朋

王十朋字龜齡温州樂清人資穎悟日誦數千言有文行聚徒梅溪受業者以百數上親政策士擢為第一累官龍圖閣直學士 宋史 宋名賢遺墨有王十朋

帖 弇州山人藁

王梅溪寵示室銘帖行書 式古堂書畫彙考

黃中

黃中字通老紹武人紹興五年擢進士第二人乾道

中為敷文閣待制謚簡肅

宋史

崔清獻公嘗刪改處士劉臯語命其客黃中隸書為

座右銘

崔清獻公言行錄

白雲崇福觀記黃中書

王信

王信字誠之處州麗水人登紹興三十年進士第孝

宗時加禮部尚書使於金信得米芾書法金人寶之

後加煥章閣待制

宋史

吳益 吳蓋

吳益字叔謙蓋字叔平俱憲聖皇后弟帝與后皆喜翰墨故益

蓋兄弟師法亦有書名益歷官至敷文閣待制進太師謚莊簡

追封衛王蓋官至武寧軍節度使贈太傅追封鄭王

宋史

吳琚

吳琚字居父號雲壑益子位少師判建康府兼留守

宋史

琚字畫類米芾以詞翰被遇孝宗大字極工

書史會要

吳琚書類米元章而峻峭過之

畫禪室隨筆

晉陵吳琚書宗米禮部幾於奪真今北固山天下第一江山題榜是其蹟也所著有雲壑集今世有米體書用雲壑印者皆吳手筆鑒家不可不知耳

書畫舫

### 吳雲壑書

吳琚書自米南宮外一步不窺京口北固山有天下第一江山榜書即其筆也始於都下見七言絕一幅不款姓名但有雲壑居士印偶閱宋經籍志雲壑集吳琚撰知為琚書已於新安白岳下山客持晦翁書

歸去來辭迺絕似米元章後有雲壑二字因得審定  
今藏於家此詩沒於焦山江中潤州守霍君為余拓  
墨本然已在若晦間不可臨摹矣

畫禪室  
隨筆

樓异

樓异字元應鄞人讀書敏而勤無不該貫小學尤精  
鄙流俗簡陋手以古字寫春秋左氏傳禮記莊子以

課其子

攻媿  
集

劉致思

劉致思留心字學運筆流快風行草偃足以軒輕流

輩

屏山集

吳公路

吳公路作功德院成入山書丹劉子翬贈詩云忽驚

落筆散彤雲

屏山集

程迥

程迥字可久應天府寧陵人家於沙隨徙紹興之餘

姚登隆興元年進士第歷知信州上饒縣奉祠寓居

鄱陽

宋史

程沙隨辨饒娥帖

余少嘗學書而病於腕弱不能立筆遂絕去不復為  
 今觀沙隨程丈此卷饒娥一紙益有意於黃絹之碑  
 者字亦可愛也饒娥故居小廟在樂平縣東二十餘  
 里余嘗特往沃茗酌之雙闕已不復存矣因語州縣  
 宜增葺之且為請敕額列祀典而莫有應者甚可歎

也

晦菴題跋



戴敏

戴敏字敏才號東臯子

戴復古父

復古有求先人墨蹟詩

云我翁有遺蹟數紙古田樣髣髴鍾王體吟句更豪

放

石屏集

虞似良

虞似良字仲房號橫溪自號寶蓮山人官至監左藏

東庫善篆隸家藏漢刻數千本心摹手追畫得旨

趣大至數尺小至蠅頭各臻其妙兼能古文奇字

謝翱

金華  
游錄

似良詩詞清婉得唐人旨趣尤工隸書無一食頃去  
筆札至寤寐猶運指作勢衾稠當指處皆裂有篆

隸韻書行於世

台志

虞兵部仲房書杜工部李潮八分小篆王宰山水圖  
兩篇隸法壞自公始然亦自成一家搏搨騫騰鯨鵬  
撮摩天矯容與烟雲卷舒數十年間豐功厚德之所  
載識借公為重不專翰墨也不知公者獨以隸古稱

豈知公哉

釋居簡北  
碣文集

陰符經碑小桃源碑洗耳碑並虞似良書

甘叔異

甘叔異行書學米芾草書學黃庭堅

書史  
會要

甘叔異字同叔豐城人力學精思工於詩咏淳熙進

士參桂州民曹攝荔浦縣

南昌  
志

湯頤年

湯頤年字養正丹陽人好讀書尤熟班氏史字畫效

歐陽率更體豪髮不用已意淳熙已酉以詞賦貢名

禮部 劉宰漫塘集

姚平仲

姚平仲字希晏世為西陲大將年十八與夏人戰滅底河斬獲甚衆欽宗召對福寧殿許以殊賞平仲請斫營擒帥以獻功不成遂乘青驢亡命奔蜀至青城山復入大面山得石穴以居朝廷數下詔物色求之弗得乾道淳熙之間始出至丈人觀道院年八十餘

紫髯鬱然長數尺面奕奕有光為人作草書頗奇偉

渭南

集

張奐

晁公武古文尚書序云余抵少城得古文全編於學

宮乃廷士張奐倣呂氏所鏤本書丹刻諸石

郡齋讀書志

宋喚

宋喚字景晉官待制手書金剛經端謹有法度始末

一體如摹印

平園集

湯思退

湯思退字進之處州人紹興十五年試博學宏詞科除秘書省正字二十五年由禮部侍郎除端明殿學士拜尚書右僕射以觀文殿學士奉祠隆興元年復

相

宋史

宋賢遺墨有湯僕射進之書

弇州山人集

楊芾

楊芾字文卿吉水人廷秀父詩句典實可以觀學問

之富字畫清壯可以知氣節之高

平園集

楊萬里

楊萬里字廷秀吉州吉水人中紹興二十四年進士  
第為永州零陵丞時張浚謫永萬里三往見之服其  
教終身名讀書之室曰誠齋開禧中遷寶謨閣學士  
光宗為書誠齋二字學者稱誠齋先生謚文節  
楊萬里跋米南宮帖云萬里學書雖徧參十方然袖  
手一瓣香五十年未曾拈出今得此帖乃知李密未

宋史

見秦王耳 誠齋集

陸元長

陸元長 陸游伯父 病右臂以左手握筆而字法勁健過人

渭南集

謝諤

謝諤字昌國臨江軍新喻人紹興二十七年中進士第光宗登極除御史中丞權工部尚書提舉太平興國宮諤為文倣歐陽修曾鞏初居縣南之竹坡名其



燕坐曰良齋人稱良齋先生

宋史

海鹽新修學記謝

諤記并書

良齋書法似蕪軾而少變其體自成一家

書史會要

劉清之

劉清之字子澄臨江人登紹興二十七年進士第調

袁州宜春縣主簿孝宗召入對改太常寺主簿光宗

即位起知袁州初清之既舉進士欲應博學宏詞科

及見朱熹盡取所習焚之慨然志於義理之學

宋史

朱文公答呂伯恭書云濂溪祠記屬子澄書而刻之

朱子文集

朱熹

朱熹字元晦一字仲晦徽州婺源人中紹興十八年

進士第光宗時除煥章閣待制謚曰文贈太師封徽

國公宋史

晦翁書筆勢迅疾曾無意於求工也而尋其點畫波

磔無一不合書家矩矱

震澤集

嘗見朱子竿牘數張蓋法魯公爭坐位書即行邊添  
註亦宛然意致蒼鬱沈深古雅有骨有筋有韻而不  
以書名固以學掩之

唐氏  
小辨

朱晦翁書自榜額之外不多見端州友石臺記近鍾  
太傅法亦復有分隸意

書畫  
眼

朱文公書出師表

余自少讀出師表輒為之喟然感涕嗚呼世無忠臣  
志士坐視國家之傾覆而莫之救也悠悠千古此恨

何窮今觀徽國文公之字畫飛動其一時慷慨激烈  
之氣尚可想見使九原可作舍二公吾誰與歸嘉熙  
己亥立秋後十日京兆杜範書於宛陵郡齋

杜清獻  
公集

聞昔朱文公酒每酣多朗誦出師表而或書之以贈  
友人今見刻本想其慷慨興起之意猶煜然點畫間  
文公嘗曰孔明有王佐之心而道則未盡學者固不  
可徒贊歎於文字之間而已要當知其心之所存道  
之所未盡庶或有得於文公所以書之之意

王魯  
齊集

朱文公與方耕道帖

吾里前輩方耕道耒乾道二年擢第歷仕有庶直聲  
受學朱張之門嘗從宣公辟為湖北帥屬文公與之  
書云既為辟客有見聞當密言又云當斟酌量度有  
益而後言又云若一言不契即欲忿然引去則不可  
文公性方峻與他人言多勉其剛烈激發而與耕道  
言更欲其委曲和緩若耕道者可謂直諒之友矣按  
宣公少從忠獻兵間所交皆大儒名卿相耕道晚出

一書生爾所見豈有超出宣公者哉然宣公懷必竭  
事必咨不以耕道之卑而不即也耕道感激知已遇  
事無隱或因杯酒輒發或欲搢笏顯誦不以宣公之  
賢而不諫也昔孔明下教許州平幼宰之參署韓愈  
送河陽從事願處士無圖利於大夫長必求屬以自  
助屬必盡忠於其長古之道也若夫長之賢未至於  
宣公屬之賢未至於耕道各宜錄文公遺墨一通置

之座右

後邨  
集

朱文公與東萊先生帖

集嘗見文公與東萊先生一帖云福建人劉氏兄弟  
爚炳同預薦送乃翁亦以免舉試禮部皆欲見於門  
下某新阡與其居密邇兩年相從甚熟知其嗜學其  
教幸與之進蓋東萊時在館閣也此書所謂晦伯爚  
也韜仲炳也十千所買之山豈即所謂新遷之近而  
季通之所擇乎昔者野人有食芹曝暄而美者持以  
獻其君野人猶然而况君子之於其君也心知其善

而忍後其事而弗告哉紹興山陵改卜之議季通竟  
坐貶死孰知君子之於君親蓋無二致也得於親而  
不得於君其勢然也觀買山之帖新阡之好豈勝慨  
然文公之書豈欲以此藝成名者而子昂仲章氏舉  
以為言豈子昂獨舉所知深解者而仲章贊之耶公  
少年蓋嘗學曹操書而劉共父誚之公以時之古為  
解然則其可以書求公乎

道園學  
古錄

朱文公手帖



國朝善書者稱秋礪黃公評考亭朱子之書曰道義  
精華之氣渾渾灑灑自理窟中流出又曰道義之氣  
蔥蔥鬱鬱散於文字間其評書如此則其善書豈直  
點畫之工而已蓋自許魏公推明朱學而立其說於  
學宮且用以取士朔南聲教所暨咸知尊信之罔有  
異說至其翰墨之妙類以儒者細事置而弗論秋礪  
公可謂目擊道存者矣道傳赴玉堂之名携考亭手  
帖北上玉堂諸老善書如秋礪公者為不少幸求其

說評之

黃文獻  
公集

徽國文公編輯文字帖

東三傳以讀春秋事猶可畧也據綱目以考通鑑法不可不備也其始終條理之際而且下問如是極精微矣凡銘識率因其家子孫門人所述類多掩惡溢美之辭使富道德而能文章者從而書之則必傳信於永久以張忠獻之賢而紫陽先生猶有悔况餘人乎故雖契家不肯假借凜然春秋之意世

蓋知所懼哉延祐改元詔取士一用朱氏學高郵龔  
璠京口郭昉同觀於虎林般若僧房時八月十又四  
日敬書

右徽國文正公考亭夫子手帖一以辭讓墓志一以  
致問起居而以編輯通鑑綱目義例得失取正於人  
皆不書官職名氏其謙已誨人之意藹然見於言表  
至今三二百年後風範猶在目前先生文章事業昭  
在史冊又豈後學窺其涯涘又奚待於稱揚褒美哉

今京口何彥徵得之於其外祖郭卑天錫彥徵寶而藏之亦庶幾知道者翰林學士士奇楊公復識其後均得拜觀文正公之手澤誦之反復起敬時永樂庚

子仲春清明後五日臨川吳均端肅書

同上

京口何彥徵氏所藏文公先生墨蹟得觀者以為至幸而題識之者互相發明殆無餘蘊矣然通鑑一書上下數千百年則本春秋為萬世公論而於契家事蹟乃以性命之憂為說而辭之豈耳目所及不及簡

冊歟抑彼此所施有不可同者歟大賢君子必有以處之此則學者所當講求也詩曰魚潛在淵或在於渚其斯之謂歟宣德三年歲次戊申秋八月望日南

郡楊溥識

同上

此卷手書凡三二書如前所云一書則折簡道問安者京口何彥徵寶藏之以示余於戲先生片紙隻字流傳於世不啻拱璧之難得况此晚年之筆其所言尤後學所當矜式者邪拜觀之餘謹識歲月於後云

宣德四年歲己酉夏四月己卯臨江後學金幼孜謹

識

同上

右宋朱夫子晦菴先生手書二通觀其於撰述張魏  
公銘誌與他書所載不同不免悔之至其所修通鑑  
綱目十年而後成然汲汲尚欲求正於人則知前賢  
於為文及著書二事其不敢忽如此後進之士率爾  
妄作者觀於此可不少致其謹乎此卷今藏何彥徵  
氏間以請余識把玩之餘遂書此於末簡以歸之宣

德四年己酉秋七月庚午後學楊榮謹識

同上

朱子畫寒詩卷

成化丙申仲夏之望集惟謙年丈解中積雨新霽出  
晦菴手墨見示展讀之二十過韻亮節清一洗塵俗  
而筆法尤道勁端重目所罕覩所惜者其先有元人  
跋十八家惟謙尊人貞孝先生惡之悉為屏去猶存  
倪元鎮一絕益高其品爾雖然世不乏人而嚴於取  
亦足以見貞孝先生之正大真足以繼晦翁之芳躅

矣把玩不忍置因識其末翰林編修吳鉞志

珊瑚網

觀晦翁書筆勢迅疾曾無意於求工而點畫波磔無一不合書家矩矱豈所謂動容周旋中禮者邪翁書自言初學魏武為劉共父所誦曰余學魯公乃唐忠臣公所學漢奸相也及考魏武本傳云漢世安平崔瑗與子實弘農張芝與弟昶並善草書而操亞之則魏武之善書信不誣矣今此詩帖真有漢魏風骨視唐宋以下自別展卷再三不勝慨嘆吳下王世貞題



上同

朱文公與姪六十郎帖

余記十年前與煥章氏題先譜推其六世祖為考亭  
夫子家藏夫子手澤甚富約至其家閱之今年冬予  
始至橫溪煥章仲子屋出視夫子與其姪六十秀才  
書一紙兵燹之餘僅留手澤者是帖也書中墓木事  
丁寧告戒望之至而責之顛又言析居事閱其失館  
地勉之以忍耐二字其家教之概如此屋時時披展

於讀書之室非朱氏子孫之座右銘乎至正二十年

冬十月八日會稽楊維禎謹識

鐵網  
珊瑚

考亭夫子七世孫厘自其祖僑居華亭者三世矣一

日出夫子與猶子六十秀才一帖益嘉言也厘其佩

服見之行事可也墓門有木則愛護之不如意事之

來則忍耐之祖訓是則是儆是不為考亭之賢孫乎

武彞山樵錢惟善謹識

同上

紫陽夫子百世之師一言一行無非妙道精義之所

發學者皆當佩服而敬守之況為其後者乎今觀此  
帖閱其姪之失館地則勉之以忍耐知其墓木之摧  
倒則囑之以修理蓋能忍貧則無苟得無恥之患念  
先隴之彫毀則無望其木思以為材之心修已奉先  
事之大者故其言懇至如此宜當置之几案時時展  
玩引而伸之觸類而長之則凡吾所當為之事皆可  
自此而推也至正庚子嘉平後學沈存端拜謹書

同上

右新安朱夫子與其所親手簡真蹟一卷詞語真淳

氣誼周密嫻睦之厚著於當時筆畫之精粲然傳世

誠為後進者之楷式也鄱陽周伯琦敬題

同上

子朱子繼續道統優入聖域而於翰墨亦加之功善

行草尤善大字下筆即沈著典雅雖片縑寸楮人爭

珍秘不啻璵璠圭璧此帖乃與姪家書畧不用意出

於自然尤可寶也展讀一過敬識諸卷尾天台陶九

成

同上

朱文公城南詩卷

右晦菴先生真蹟筆精墨妙有晉人之風大賢無所不能固非可一藝名也當時先生由建中回新安時

所書流落人間文傳薄游婺源得之携以歸吳中嘗同仁夫一觀餘不以示他人也近伯廣自琴川來訪病中不及款曲別後思所以見意念他物皆不足浼伯廣因書於卷尾令淵持贈之轉似仁夫仍題數語

云吳郡干文傳

鐵網  
珊瑚

朱子與南軒先生友善此城南二十咏和南軒而作

者穆聞之先工部君言在元吾鄉尚書干公文傳嘗  
尹婺源婺源朱子闕里也公得此於其五世孫光後  
秩滿歸常熟錢伯廣者愛之公即以贈伯廣乃構城  
南齋因以城南自號金華黃文獻公為記伯廣沒卷  
為鄉友虞子賢所得子賢復構軒二十楹各顏其詩  
於上兵變後卷流落不知所在穆近於致政侍郎陽  
羨沈公家見之不覺大喜卷後有干公跋楊廉夫復  
為子賢補書南軒原倡最後子淵一跋與先君之言

正合淵字資深尚書公孫也

寓意編

晦菴先生潛心聖賢之學探索至道其於詞章字畫  
蓋有不暇留意者今觀先生自書所和張宣公城南  
雜咏二十首其詞渾厚和平有盛唐風致其字如孤  
松老柏晉宋間以書名家者未易及也是雖大賢多  
能所到其所以然者亦本於心耳先生之學以正心  
為本夫詩心聲也字心畫也心得所養則發之於詩  
形之於字卓乎絕俗豈世之憊精疲神以學詩學字

者所可髣髴哉善學先生者詠其心聲玩其心畫則  
放心自復鄙吝自消固可得其心法於詞句點畫之  
表矣方伯沈公時暘得此卷寶之不啻懸藜照乘之  
珍間出示余拜觀之餘肅然起敬謹識其後而歸之

椒邱  
文集

朱文公手帖

太師徽國朱文公帖一紙韻度潤逸比他日所書人  
以為尤可玩瀟雖不敏則非特玩其字畫而已也蓋



有所感也帖中云恭叔尚未至只文叔到已兩日矣  
見約誠之在此相聚也文叔名友文恭叔名友恭姓  
潘氏二人實為兄弟恭叔通禮樂文公之修三禮以  
儀禮與禮記相參通為一書其不合者分為五類周  
官則別為一書恭叔實與討論之列文叔尤善問辨  
文公與論大學致知格物之義雖反覆數四而弗措  
誠之游澹軒也澹軒早從張宣公游晚復事文公文  
公過之如黃直卿則三人者皆其高第弟子計其一

時師友相從之盛聚精會神德義充洽如在泗沂之  
上自今道隱民散時觀之不啻應龍游乎玄關欲一  
見之而不可得徒以貽有識者之感慨不亦悲夫此  
帖無歲月不知何年所發其或學禁未興講道於竹

林精舍時卯

宋學士集

書朱文公墨蹟後

右晦菴先生書小宛詩夙興夜寐四大字今兵部尚  
書錢塘方公之所藏也先生上承周孔道統之傳故

凡一言皆將為天下後世之法而亦皆本於聖人之  
經與易之自強不息書之無逸同理蓋人無貴賤大  
小未有不由斯理而能有成至於為子為臣其宜務  
於此加切故曰夙興夜寐無忝爾所生又曰夙夜匪  
懈以事一人今公為國大臣承寵眷之隆二親具慶  
躋耄期之壽為天下所歆羨仰望而惓惓於寶此書  
者其將佩古人之格言篤忠孝之大節將以示法天  
下之為臣子者乎此公之所宜勉也因拜觀此卷謹

識其後而歸之

東里集

朱文公小行書卷

世但知晦翁扁書作松枯石老以取蒼勁不知其草  
草狎書乃天真秀異若此蓋由沈浸於禊帖中得真  
神而偶然出之若稍加意即是李廣第二番射石矣

恬致  
堂集

朱晦翁與時宰二劄子

寬伏讀文公與時宰二手劄大儒君子恬靜剛正之

氣數百載之下猶充溢紙墨間其門人叙公事行所謂謹難進之禮厲易退之節不貶道以求售不徇俗以苟安者亦畧可以窺見矣二劄今為盱眙陳明之所藏明之初登進士第將有官守其不徒玩此必有所以嚮慕之者在矣成化甲辰六月十九日長洲吳

寬謹題

式古堂書  
畫彙考

右徽國公晦菴先生上時宰王淮劄子前一劄乃淳熙五年知南康軍時值歲饑乞減星子縣稅後一劄

乃八年為浙東常平茶鹽時亦值歲饑繩治婺之豪  
民年譜載婺有富民以貲得官素交貴近藏米山積  
不糴一粒宜奪其官恐即其人茲二事俱已入奏訖  
復此具劄祈扣之至者異其亟賜俞允也而淮視之  
漠然亦有唐仲友者與淮同里閑為嫻家仲友知台  
州時貪盜淫虐蓄養亡命徽國按得其實章凡十上  
淮皆匿之徽國論之益力至於不得已始取初章與  
仲友所自辨者雜進竟脫仲友重譴觀此則二劄誠

妄投也豈微國一時昧於知准者哉夫進賢退不肖  
宰相之責也親君子遠小人主之要務也微國歷  
事孝光寧宗屢以正心誠意與當世急務勸進經帷  
上方開納延攬而左右輔弼輒肆沮抑至命臺諫排  
擊偽學使其擯斥不得進用微國自登進士五十年  
仕於外者凡九考立朝纔四十日而已奸佞在內賢  
者疏之於外淮欲辭其責可乎朝廷偏據一隅祖宗  
之誓不復而任相如此宋祚亦可知也淮娶之金華

人後人不知重此二劄遺棄湮沒乃為鄉之賢士傅子賢得之非其後人不知慎此正以先世居廟堂之上而不能進用賢者蓄此適足以益重先世之媿耳其棄之也宜哉子賢知寶昔賢遺墨珍藏篋笥有年因裝潢成卷遣其子寧求予題敬為書此以歸正統八年冬十一月既望朝議大夫南京國子祭酒四明

陳敬宗謹識

太學生金華傅寧歷事於棘寺持文公朱先生二劄



子求題其後前劄則知南安軍時乞減稅請祠二事而請祠尤切故拳拳以哀病疲憊兩目昏澀精神枯耗為言後劄則以婺之豪民奸猾不從教具奏申省祈丞相敷奏行遣為言二劄子迄今若干年矣辭嚴義正字又遒勁令人觀之肅然起敬者何哉蓋文公之德之學繼已往之聖賢開未來之學者而又優於當時之吏事也而祭酒四明陳公敬宗謂二劄俱上時宰王淮按其知南康軍時史浩為相王淮知樞密

院事趙雄范成大參知政事淮未為相也劄中有二  
公之門亦具稟劄之語其謂趙雄范成大歟及提舉  
兩浙時王淮在相位然文公之改兩浙王淮薦之也  
及因唐仲友始改文公提點江西刑獄則前劄恐上  
史浩後劄上王淮也噫君子所守者道所疾者惡故  
難進而易退觀二劄可知故立朝纔四十有六日而  
去若夫小人所徇者私故患得患失貪位固寵無所  
不至也雖然天意固有在也聖人道不行則述六經

垂教萬世文公道不行則明六經以開來學微聖人  
與文公則天下後世貿貿焉莫知所之矣此其天意  
所使也歟傅生能保二劄而藏之又求題其後其能  
取法於聖賢者歟則其志其才之所就誠未可量也  
因題其後而歸之景泰二年歲次辛未冬十月戊子  
南京大理寺左少卿吉水廖莊敬書同上  
右文公先生與執事劄子二紙其一在南康論減稅  
請祠事其一在婺論豪民行遣事國子祭酒陳公敬

宗以為皆上時宰王淮者刑部侍郎廖公莊謂文公  
在南康淮尚未相前劄乃上史浩劄中所稱二公者  
趙雄范成大也按此二劄皆不載刻本全集此二紙  
婺人傅寧氏所藏盱眙陳進士明之得而藏於家謹  
識其後而歸之成化乙巳三月既望後學長沙李東

陽書於懷麓堂

同上

呂勝已

呂勝已字季克邵武人與張南軒朱晦翁講學工隸

書得漢法仕為湖南幹官歷倅江州知杭州自號涓

川居士

八閩  
通志

黃銖

黃銖字子厚崇安人少師事劉子翬與朱晦翁為同

門友為文畧相上下隸書甚古得晉魏以前筆意

八閩

通志

魯三異

魯三異字無疑少有詩名楊文節公深喜之尤尊經

學屢從朱文公問辨端平初以祕閣校勘召力辭強起造朝授承事郎主管華州雲臺觀能作小楷書六

經諸書自號雲篆

胡桐峽江縣志

張栻

張栻字敬夫漢州綿竹人丞相魏公子也官至修文殿修撰謚曰宣學者稱南軒先生式古堂有寄劉公詩帖墨蹟汪珂玉藏宋名公翰墨合卷有官屬

帖

文藝之六 卷之三十四十八

六藝之二 卷之三十四十九

凡朝書錄

宋于延之常州無錫人咸興十八年

宋于延之常州無錫人咸興十八年

六藝之一錄卷三百四十八



欽定四庫全書

六藝之一錄卷三百四十九

錢唐倪濤撰

歷朝書譜

宋

尤袤

尤袤字延之常州無錫人紹興十八年擢進士第紹熙中官煥章閣待制嘗取孫綽遂初賦以自號光宗

書扁賜之謚文簡

宋史

尤延之論古人筆法來處如周太史莫世系真使人

無間言

朱子文集

陸游

陸游字務觀越州山陰人年十二能詩文蔭補登仕

郎鎖廳薦送第一孝宗時范成大帥蜀游為參議官

以文字交不拘禮法人譏其類放因自號放翁嘉泰

三年升寶章閣待制

宋史

務觀筆札精妙意致高遠

朱子文集

陸游暇日弄筆戲書詩云草書學張顛行書學楊

風

劍南集

陸放翁與魯原伯帖

余大父著作為京教考浙漕試明年考省試呂成公  
卷子皆出本房放翁與魯原伯帖云主司劉某天下  
偉人也故足以得之家藏大父與成公往還真蹟大  
父則云上覆伯恭兄成公則云拜覆著作丈時猶未  
呼座主作先生也成公父倉部娶茶山女原伯茶山

長子名逢官至大理卿仲躬次也名遠官至侍從皆成公母舅放翁學於茶山喜成公得薦書賀原伯如此余為儀真掾原伯孫黯字溫伯為揚子宰出此帖於縣齋余曰君收放翁帖千百紙此幅闕我家門戶盍輟以見惠溫伯不與後與溫伯同朝求之復不與晚使江左與溫伯書曰初見帖時余纔三十今遂六十君且八十不得帖死有遺恨溫伯亦愴然緘帖餉余帖內云叔遲者茶山季子也名迅樂道者溫伯父

也名繁溫伯擢第人物高雅詞翰精麗有晉唐風韻  
放翁嘗舉自代今桂冠居越上初茶山深於禪學厚  
勤杲二公故叔遲入山訪杲茶山有詩歎勤前輩不  
獨篤於師友其於物外高人亦極其惓惓今士大夫  
不復然矣

後邨  
題跋

陸放翁帖

鏡湖一曲皆翁吟嘯提封翁所自有非若賀祕監請  
而有也遂與山僧巷友爭漁樵席翰墨淋漓人爭得

之是三帖遂為勤上人所藏

北磧集

陸放翁手簡二帖

放翁以詩名重天下受知周益公范文穆為中興大  
家嘗讀其劍南集愛不忍去手思見其人而不可得  
今得觀此二帖恍然如侍左右何其幸哉然放翁在  
當時不以書名而道嚴若此真所謂人品既高下筆  
自不同者也二帖一與仲信議婚一為明遠題卿禪  
師遺墨放翁到今不為久遠而此三人者皆不可知

昔蔡明遠鄱陽一卒爾以魯公之書而傳仲信既與  
翁結婚而禪師遺墨有見晚之恨則二公要皆非尋  
常流輩人矣而余皆不知之鄙淺可歎此卷既歸墨  
林墨林博雅好古而蓄書極富必能考以補余之不  
逮也嘉靖戊子仲冬廿日後學文彭謹題

續書畫  
題跋記

蔡發

蔡發字神與

蔡元  
定父

家建陽麻沙幼警悟七歲能為詩

中年買田築室於武夷之陽字畫壯偉意氣閒暇

朱子

文集

方士繇

方士繇字伯暮一名伯休蒲陽人朱公元晦倡道學於建安往從之以傳道為後學師工於書自篆籀分

隸行書諸體皆極其妙

渭南集

朱文公荅蔡季通書云篆隸碑子字畫皆不滿人意

未有可寫之人今伯暮篆云何

朱子文集

李積微



李積微篆字墨本近偶得之

朱子文集

楊方

楊方字子直朱子答子直書云煩為作小楷四箴百

十字當字學絕欲得妙札時以寓目

朱子文集

鄒德久

鄒德久忠公浩子筆法追蹤山谷

文字禪

鄒德久楷書大學今人寫得如此亦是難事

朱子文集

芮國器

芮國器字仲蒙陸游詩云落筆龍蛇仲蒙帖劍南集

唐璘

唐璘字伯玉古田人嘉定十年舉進士為監察御史

擢太常少卿宋史

伯玉工筆札其蹟見鳳墅續法帖中書史會要

蔡幼學

蔡幼學字行之温州遂安人年十八試禮部第一嘉

定中權兵部尚書兼太子詹事早以文鳴於時中年

述作益窮根本器質凝重莫窺其學

宋史

蔡行之擅毫翰其蹟見羣玉堂法帖中

書史會要

樓鑰

樓鑰字大防明州鄞縣人隆興元年試南宮考官胡

銓稱之曰此翰林才也寧宗時參知政事進資政殿

大學士提舉萬壽觀贈太師謚宣獻鑰文辭精博自

號攻媿主人

宋史

鑰善大字高宗時太學成奉勅書扁

書史會要

婁機

婁機字彥發嘉興人乾道二年進士為太常博士祕書郎太子始就外傅以機兼資善堂小學教授以累朝事親修身治國愛民四事手書以獻太子寘之座右朝夕觀省太子得機所著廣干祿字一編尤喜命戴溪跋之擢監察御史歷禮部尚書同知樞密院事參知政事嘉定二年以資政殿學士知福州機深於書學尺牘人多藏弃云

宋史

漢隸字原樵李婁君彥發所輯也合蔡中郎諸人筆  
力通神之妙皆聚此編

洪邁漢隸  
字原序

陸九齡

陸九齡字子壽居撫州之金溪登乾道五年進士第  
調全州教授寶慶二年特贈朝奉郎直祕閣賜文達  
謚與弟九淵相為師友學者號二陸

宋史

子壽窮性命之源其於字畫未必屑屑求工者今觀  
所書端穩深潤有法度臨學之士或有所未及乃知

有德有言者於區區字畫亦不苟

徐一夔始豐藁

蘇玘

蘇玘字訓直泉州同安人以恩補將仕郎調嚴州遂

安尉擢為尚書吏部郎屬文有體制筆法簡遠其尺

牘尤時所珍愛往往藏弃

渭南集

蔡迨

蔡迨字肩吾官捷為郡文詞字畫皆過人從銓部得

桂陽令

渭南集

周模

周模字伯範鄆人篤志於學從濟南劉壽夫游又學

書於曜陽徐濟父有楷法

攻媿集

王禔象

王禔象濟南人問學精深兼通醫卜工真行草篆不

樂進取屏居青崖山之兩河

攻媿集

樓少虛

樓少虛官教授少好二王書筆力素高後得樂毅論

古刻深愛之一筆不妄下故楷法精妙字字可敬

攻媿

集

顏直之

顏直之字方叔長洲人工小篆得秦詛楚文筆意嘗  
為參政樓鑰書攻媿齋榜鑰賦詩美之著集古篆韻  
二十卷直之氣貌豐碩善攝生以弓矢應格差監省

倉句祠主管仙都觀號樂閒居士

張景吳人  
中人物志

葉適



葉適字正則温州永嘉人為文藻思英發擢淳熙五年進士第二人寧宗時權工部侍郎奉祠者十三年

至寶文閣學士贈光祿大夫謚忠定

宋史

葉正則書法蔡君謨而自有風骨

書畫題跋記

許奕

許奕字成子簡州人慶元五年寧宗親擢進士第一授簽書劍南東川節度判官召為祕書省正字累遷吏部侍郎龍圖閣待制以顯謨閣直學士致仕贈通

議大夫通籀隸書

宋史

奕詞章雅健字體端勁兼通籀篆書

鶴山集

薛師石

薛師石字景石號瓜廬小楷初授法於單炳文日經月緯已忽超詣落筆期於鍾王之次籀篆斯隸深造其極四方士友求於門景石不靳惜大者徑三數尺許銘祖父者以不得景石書為恨有瓜廬集若干卷

王綽

陳孔碩

陳孔碩

陳韓父官尚書郎

福州侯官人為朱熹呂祖謙門人

宋史陳

韓傳

北山先生陳公詞章翰墨為近世第一筆勢道美嘗

作贛州三橋詩自書而篆之

西山集

劉克莊曰余少欲為書堂復齋陳公為書金鳳池三

字北山陳公為書後邨精舍四字楷篆極妙

後村集

陳宓

陳宓字師復丞相俊卿之子少嘗及登朱熹之門長  
從黃幹游以父任歷知安溪縣嘉定七年入監進奏  
院出知南康軍寶應二年直祕閣主管崇禧觀贈直

龍圖閣

宋史

陳師復字森嚴清勁見者如端人正士在前凜然起

敬

西山集

自蔡公仙去里中書學遂絕近歲二陳出焉崇清宜  
大字愈大愈奇復齋字可至二三尺而小楷行草端

勁秀麗在崇清上寸紙流落人爭寶藏至今後生輩

結字運筆十人中九作復齋體

後村集

### 卓景福

劉克莊跋卓景福臨淳化集帖云陳復齋謂余曰少時實師九成宮記今五六十年矣當向上作工夫豈必尚寄率更籀下邪所跋卓君臨淳化集帖凡一百十有五字老氣森嚴殆欲埽去歐虞褚薛而自為一家者卓君益其中表親授筆法今亦以能書名聞之

奕家子弟必高師一著豈惟奕哉逸少衛夫人弟子也突過其師大令逸少子也與父齊名卓君勉旃復齋可作必有吐吐逼人之歎矣

後村集

余伯咎

余伯咎善小篆北山陳公曰伯咎筆法極高

後村集

張汝永

張汝永字瑞寰世居金壇之上為文雅贍作字有古法而行書尤勝嘉定甲戌廷對中選授含山主簿調

溧陽丞

劉宰漫塘集

魯繫

魯繫號樂道雅望甚偉善筆札

王柏魯齋集

林師點

林師點字詠道臨海人自號竹村居士性嗜書傳近

購遠求藏數千卷至遇古帖秘文斷刻墜簡積之亦

千餘卷篆隸尤留心以張謙中虞仲房為法

林逢吉赤城集

羅士友

羅士友字熹善一字晉卿自號融齋生而穎發嗜書

忘寢食學書入楷得蔡氏風度

文山集

魏了翁

魏了翁字華父邛州蒲江人慶元五年登進士第嘉

熙中資政殿大學士謚文靖贈秦國公

宋史

方岳圖書扁所詩云獨慚鶴山翁健筆照衡宇

秋崖集

鶴山先生善篆不規規然繩尺中而有自然之勢嘗

以篆法寓諸隸最為近古

書史會要



宋人能篆者頗多於唐蜀魏文靖公至今為人所稱

全蜀藝  
文志

魏鶴山遺陳深父子帖

昔蕭穎士有老臧事之十年不去穎士性慘刻嘗楚  
不少貸或勸臧他之臧曰非不能愛其才爾夫穎士  
以操觚弄翰尚足以懷其奴隸而不忍舍今陳深父  
子之事鶴山也服役勞苦於寂寞之濱趨走辛廛於  
風波之險七年之久儼如一日此非其主有以懷而

信之疇能爾邪及主人自靖歸蜀始以念母翻然告  
歸且願還而盡此身以事主夫於事主既能盡忠則  
於事親必能盡孝視蕭氏奴殆有過焉余曩偕鶴山  
外舅久處渠陽始終目擊其事今觀鶴山所書慨然  
有感因筆以贈之紹定五年冬十月書於心遠堂虞  
玠

魏鶴山與杜範李心傳手札

了翁在理宗朝與真德秀齊名皆深於理學以直道

不為時宰所容杜李二公亦皆一時名臣則其手札  
為世所重非但以其字畫之工以其賢也按理宗嘉  
熙二年以李心傳為秘書少監史館修撰心傳有史  
才通故實弟道傳尤明河洛之學性傳位至同知樞  
密院事淳熙五年以杜範為右丞相兼樞密使範抗  
言時政無有所隱初為殿中侍御史劾奏鄭清之李  
鳴復其後不肯與鳴復共政避位去其為人如此

震澤

集

魏克愚

魏克愚字明已號靜齋了翁子亦工篆

書史  
會要

李從周

李從周字肩吾彭山人博見彊志書名之學世亦鮮  
及之渠陽山中為余從子令憲書鄉黨篇余獲與觀

馬鶴山  
集

李肩吾字子我魏文靖公門人能書取隸楷之合於

六書者作字通行於世

書史  
會要

李心傳

李心傳字微之宗正寺簿舜臣之子也慶元元年薦於鄉晚下第絕意不復應舉晚因崔與之許奕魏了翁等合前後二十三人之薦為史館校勘賜進士出

身端平三年為工部侍郎

宋史

南渡諸公如魏鶴山李心傳書往往相似蘇黃筆法

至是又一變云

震澤集

真德秀

真德秀字景元後更為景希建之蒲城人登慶元五年進士第授南劍州判官繼試中博學宏詞科為太學正紹定中拜參知政事進資政殿學士提舉萬壽

觀謚文忠

宋史

真西山與周卿手簡

周卿諱德文吾鄉王氏之先也仕宋雖不甚顯然其學實出於其曾伯祖信伯先生帖中所謂先著作是也故西山真先生也特與之遊他如魏參政了翁游

丞相似杜丞相範王待制遂亦嘗舉薦蔣陵陽李侍郎心傳因謂其所交皆天下正人然則此帖豈非其

一左證也哉惟顯其善藏之吳寬謹題

式古堂書畫彙考

西山先生書似草草作諦觀乃非草草者雖不全用晉人之筆法而亦不出於法之外豈胸次高故落

筆自不同邪

震澤集

洪咨夔

洪咨夔字舜俞號平齋於潛人嘉定二年進士官至

刑部尚書端明殿學士贈兩官

洪聖俞道場詩并札

法舟昨枉國史中書直院判部侍郎頃載登山佳什  
敬雪手圭復誠負暗投之愧竊謂蘇文忠公昔遊有  
詩以贈華老學士壽之堅珉山倚詩重法舟最爾寒  
緇茲亦何幸獲此寵遺得與雲鬟爭翠謹龔石山  
中作雲峰蘇洪帖云端平乙未維夏住山傳法法舟

書

式古堂書  
畫彙考



平齋先生洪公宋南渡後大手筆也孟頫弱冠以愛  
讀文集恨生晚不得拜下風先生五世孫為僧於天  
目師子寺名智俊過溪上出此示僕三復之餘既歎  
詩律之深及觀所與安撫書又見公於國事用心如  
此撫卷起敬輒書其後孟頫

同上

天目洪忠文公遊道場何山詩與眉山蘇文忠諸作  
先後相映真若所謂山倚詩重者矣忠文此詩當時  
已摹勒入石自端平甲午迄今已一百二十二年而

真蹟宛然猶在誠可寶也至正十五年乙未五月十

日金華黃潛觀於中天竺因書其後識歲月

同上

右侍郎洪公奉其親少師公遊道場何山遺住山舟  
公別浦禪師詩也今歸之即中常上人常往年侍其  
師竺遠源禪師住吳山時見其六世孫大拙用公以  
是遺墨獻於禪師常因珍襲而寶愛之茲來歸源蘭  
若焚香敬觀惜不得見所與安撫書耳然山中舊石  
刻薦更兵燹不復存矣故翰林承旨趙公學士黃公

跋語在前惟善何敢著筆輒綴數語於後以識俯仰

今昔文物陵替山林彫謝無復舊觀之感慨云至正

二十六年歲丙午佛誕日曲江居士錢惟善謹書

同上

平齋洪公在宋季趙山臺真西山魏鶴山皆參大政

位貌德業相表裏而嚴重過之舟別浦主瑤席軒公

奉八十慈親漫遊兩山題詩紀勝句法追躡歐

疑有脫字

自蘓玉局題惟公詩出色刻諸琬琰何愧然神物顯

晦有時會當三刻茲山墨蹟三獻即中其善藏之時

龍躡丹虺瞻依元菟林屋山樵人法膺擇中跋同上

鄭清之

鄭清之字德源慶元之鄞人初名變字文叔嘉泰十

年登進士第嘉熙七年拜太傅右丞相兼樞密使進

封齊國公追封魏郡王謚忠定

宋史

清之工筆札其蹟見鳳墅續法帖中

書史會要

史彌遠

史彌遠字同叔淳熙十四年舉進士寶慶六年拜太

師右丞相兼樞密使魯國公追封魏王謚忠獻

宋史

彌遠工筆札其蹟見鳳墅續法帖中

書史  
會要

杜杲

杜杲字子昕邵武人淳祐中為敷文閣學士兼吏部

尚書淹貫多能為文麗密清嚴善行草急就章

宋史

楊簡

楊簡字敬仲慈溪人乾道五年舉進士授富陽主簿  
常平使者朱熹薦之紹熙五年為國子博士嘉定元

年授秘書郎寶慶元年轉朝議大夫慈溪縣男尋以  
寶謨閣直學士致仕咸淳間制置使劉黻即其居作

慈湖書院宋史

慈湖字畫端嚴清勁使人望之凜然亦足以見其所

存不惰而隨寓有則杜範清獻公集

楊慈湖手書孔壁孝經

司馬文正公平生未嘗草書雖造次顛沛間一點一

畫必如法度觀其書者即知公之為人慈湖先生楊

公道德學問追媿前修而於翰墨尤極嚴謹嘉定初  
獲侍公於著廷見其酬答四方書問無一字作行狎  
體蓋其齋莊中正表裏惟一故形於心畫亦絕類文  
正公而清勁過之傅君佺所藏孔壁孝經又其得意  
書也嗚呼先生不可作矣學者即此而觀之猶足以  
窺大賢氣象而知立德之本云

西山集

薛季宣

薛季宣字士龍永嘉人年十七起從荆南帥辟召為

大理寺主簿大理正出知湖州改常州

宋史

薛士龍抄書動千百卷未嘗有一字行草

止齋集

薛寺正於書無不讀耽玩鍾鼎古文搜竒抉怪几易

識者多不用古文所無間以小篆補其闕真好古哉

攻媿集

陳傅良

陳傅良字君舉温州瑞安人研精經史貫穿百氏以

斯文為己任官至寶謨閣待制贈通議大夫

宋史云謚文節



風度高遠動輒過人詩律之精深字畫之道媚登覽  
高致吟諷低昂親之則使人意消王謝韻度尚可想

也

攻媿集

林希逸

林希逸官考功員外郎能書

書史要會

林希逸字肅翁號竹溪又號虜齋福清人乙未榜由

上庠登第凡三試皆第四是歲真西山知舉

癸辛雜識

林泳

林泳希逸子亦能篆

書史會要

姜夔

姜夔字堯章番陽布衣也自號為白石生好學無所

不通請於朝欲政頌臺樂律以議不合而罷有大樂

議琴瑟考鏡歌等書傳於世運筆道勁波瀾老成著

續書譜一卷議論精到用志刻苦筆法入能品

謝采續書

譜序

趙子固目姜堯章為書家中韓

研北雜志

姜白石書法迴脫脂粉一洗塵俗

書史會要

張即之

張即之字溫夫歷陽人參知政事孝伯子中進士舉  
歷司農寺丞授直祕閣以能書聞天下金人尤寶其

翰墨

宋史

張溫夫祕閣喜作擘窠大字不一詩輒畫一幅絹金

人極愛重之好書少陵古柏行

弁州山人藁

張溫夫書老柏行

溫夫特善大書扁額字如作小楷不煩布置而清勁  
絕人余屢見所書楞嚴道德經雖甚纖小皆得筆興  
此卷老柏行規格絕類但此卷中策掠進止轉摺間  
殊不自遂豈溫夫書時因筆墨未愜自如補緝哉

集

方洲

張溫夫大字

即之作大字如寫小楷而筆意兼行轉折作止之態  
如老生作禮雖骨格強硬而意度調熟見之者自當

歎重此卷三字尤為卓絕非常所見

方洲集

張即之墨蹟

昔人謂八音與政通而文章以時高下豈惟文章哉  
字畫亦然故因時可以知書因書可以驗時有不可  
逃者張即之生宋南渡後書名在當時甚盛此所書  
杜詩已不完開化徐敦夫得以示余蓋書之變至此  
已極當時所以重之則世變亦可知矣夫即之欲自  
成家故其書法如此若以虞道園之說斷之則亦太

甚矣乎

匏翁家藏集

張溫夫書進學解

右宋張即之書韓文公進學解即之字溫夫別號樗  
寮叅政孝伯之子仕終太子太傅直祕閣歷陽縣開  
國男其書當時所重完顏有國時每重購其蹟史稱  
即之博學有義行而袁文清師友淵源錄亦言即之  
修潔喜校書經史皆手定善本語乾道淳熙事先後  
不異史官書蔽其名按皇宋書錄即之安國之後甚

能傳其家學安國名孝祥仕終顯謨閣學士所謂于湖先生孝伯之兄即之之伯父也其書師顏魯公嘗為高宗所稱即之稍變而刻急遂自名家然安國僅年三十有八而即之八十餘歲咸淳間猶存故世知有樗寮書而于湖鮮稱之者此書無歲月可考而老筆健勁大類安國所書盧坦河南尉碑豈所謂傳其家學者耶周誥商盤下缺一字實徽宗御名韓文商本作殷豈亦以諱避就耶故浙江叅政崑山張公敬

金定四庫全書  
卷三百四十九  
之舊藏此冊公卒無子圖書散失從孫比部員外允清以重直購之允清所謂惓惓於此豈直字畫之妙而已後之子孫尚知所寶哉

甫田集

### 張樗寮正書金剛經

昔吳關外門有駐節字大可二尺許古雅道勁極得大書之體余少時見而愛之先主事都水公曰此張即之筆也復於一統志和州下載即之特善大書以是知先君益有所見云若細書則未之聞也茲偶見



此經大不過指尤俊健不凡乃知樗寮不獨善大書  
已也書史會要記樗寮歷陽人歷陽隸和州即今含  
山明隆慶庚午春三月吳陳銓識

書畫題  
跋記

張樗寮書蓮華經

四明有宋刻張即之妙法蓮華經一裹其木今不識  
為何材中雖有蛀孔字皆堅緻如石似有物訶禁之  
者歷世靈顯不可一二舉余宦四明得廿餘裹往歲  
佛屋災像經皆灰余驚痛不已火後撥燎燼乃得二

三表完者周緣焦糜字幸無損豈北地天龍未習瓌  
寶既取諸有餘而又不忍盡邪乃為裝稽成帖以存  
數百年之遺樗察昔人斤為惡札今詳其筆意亦非  
有心為怪惟象其胸懷元與俗情相違逆不知有勻  
圓之可喜峭挺之可駭耳自開天以來千竒萬異日  
新不已何獨字法不得任情哉

墨林  
快事

陳讜

陳讜字正仲興化人官至尚書與張即之同時並以

書名

書史  
會要

張即之陳讜之書一時藉甚豐碑巨刻散流江左

衍  
極

楊鎮

楊鎮字子仁號中齋嚴陵人尚理宗女周漢國公主  
官至左領軍衛將軍駙馬都尉謚端孝喜觀圖史書

學張即之

書史  
會要

單煒

單煒字炳文號定齋居士沅陵人博學能文考訂法

書尤精字畫道勁得二王法度

書史會要

徐璣

徐璣字文淵任建安主簿移武當令改長泰令工唐

詩得魏人單煒教書法心悟所以然無一食頃去紙

筆暮年書近蘭亭

葉適水心集

劉克莊

劉克莊字潛夫號後村興化人官至尚書謚文定書

迹亦佳

書史會要

王埜

王埜字子文婺州金華人登嘉定十二年進士第寶  
祐二年拜端明殿學士簽書樞密院事封吳郡侯工  
於詩書法祖歐陽詢署書尤清勁

宋史

寶婺觀中八詠樓扁智者寺倚松亭扁靈源勝地四

大字皆潛齋王公埜書

金華游錄

赤松山亭額王埜書

徐沁金華

游錄注

蘇基先

蘇基先温之瑞安人登寶祐癸丑第初調臨安府浙

江稅終金華令辭章雋永不事雕飾作詩平淡潔

雅正書淳健結密行草有楊少師風致

王魯齋集

陳公著

陳公著四明人登寶祐丙辰進士初歷州縣時宰欲

致之門下弗附累官至朝奉大夫祕書監知台州題

松江圖古箋詩一首時年八十矣用筆沈著端勁而

行復勻整不苟足以占知其為有德君子也

匏翁家藏集

韓境

韓境字仲容相臺之秀寓居於越嘗以架閣言事貶

於婺詩書筆札皆工

王魯齋集

曹松泉

曹松泉天台人攝棗陽倅日穆陵遣賜督府詩字可尺許松泉效李陽冰篆作一圖以賀又以古篆文十

二冊為侑

書史會要

傅穉

傅穉字漢孺湖州人善歐書施宿刻父元之所注坡

詩俾書之

癸辛  
雜識

丁魏

丁魏嘉熙間監行在左藏西庫能篆

書史  
會要

張湜

張湜丹陽人長於詞翰兼能篆

書史  
會要

洞陽館記張

湜書

廖瑩中



廖瑩中字羣玉撰福華編稱頌似道鄂功

宋史賈似道傳

賈師憲客廖羣玉以淳化閣帖絳州潘氏帖二十卷

並似真本書丹入石皆逼真

癸辛雜識

何基

何基字子恭婺州金華人景定五年詔舉賢基被命

添差婺州學教授兼麗澤書院山長力辭咸淳初授

史館校勘兼崇政殿說書改承務郎主管西岳廟終

亦不受卒謚文定

宋史

北山何先生書清勁端楷無一筆匆匆亦足以見其

心德深潛純粹之懿

王魯齋集

何欽

何欽字無適北山先生之嗣子也天才不羣書有晉

宋之風焉

王魯齋集

何無適善草書

何基北山文集附錄

馬光祖

馬光祖字華父婺州金華人寶慶二年進士調新喻

主簿從真德秀學累官寶章閣直學士沿江制置使

知建康府兼行宮留守咸淳三年拜參知政事五年

拜知樞密院事謚莊敏

宋史

高座寺雨花臺記馬光祖文并書

鄭僑

鄭僑字惠叔號回溪興化人狀元及第官至參知政事贈太師封郇國公謚忠惠善行草著書衡三篇

書史

會要

鄭寅

鄭寅字子敬僑子官至尚書左司除寶章閣待制博

極羣書留心翰墨作包蒙七卷

書史  
會要

陳恕可

陳恕可字行之一字如心光州固始人以廕補將仕

郎咸淳十年中銓試授迪功郎泗州虹縣主簿以平

江路吳縣尹致仕詩文醇正近古小篆似吳興張有

自號宛委居士

陳旅女  
雅堂集

陳瑛

陳瑛字伯英為郡教授篆書千文字體整潔咸淳中

人全蜀藝文志

龔開

龔開字聖與號翠巖淮陰人宋兩淮制置司監官博

聞耿介作古隸得漢魏筆意書史會要

顏汝勛

字元老直之子官至朝請大夫亦工篆長洲志

上官必克

上官必克字復之幼警敏八九歲已善楷書逾冠領鄉薦慶元五年授迪功郎監成都府稅務調全州錄

事叅軍

陳讓邵武府志

余煥

工大小篆書筆勢竒偉真文忠公嘗使書聖賢言揭坐側稱其如正人端士服吉衣冠巍然拱手使人望之起肅敬雖嚴師善友曾不過是

閩書

蕭前

蕭前

蕭翦字則山新喻人紹定五年進士以史館校勘遷  
武學博士進太府丞求補外遂奉祠得肆力於文字  
工篆隸凡名勝扁額多其所書尤善吟咏號大山

管大

勲臨江府志

### 林宗道

林宗道字仲學福清人為文章以材器自負善隸書

晚年用筆益蒼勁景定間嘗領鄉薦

八閩通志

### 鄭東起

鄭東起舊名震龍福清人居教授為文章有氣魄

亦善字書學者多寶愛之

八閩通志

陳振

陳振字震亨古靈先王裏之後為文簡健無宋季陋

習好楷書有歐虞氣骨官至太府寺丞歷知永瑞二

州 方鵬崑山志

黃仁儉

黃仁儉字約之奉化人官青田丞書法甚精源流二



王而道勁似歐陽率更真草行書皆見重於世

張時徹寧

坡志

### 陳仲輔

陳仲輔歸善人博學善屬文工於隸篆為世所重嘗作枕屏篆五箴文遺侍講陳鵬飛鵬飛以詩答之云  
闌干一幅鵝溪絹中有五箴排小篆銀鈎小變科斗

文挂我牀頭星斗爛

楊載鳴惠州府志

### 謝履

謝履字履道第進士調南安主簿歷祕書丞知婺州

善行隸有雙峰詩集行世

林應標惠  
安縣志

黃孝綽

黃孝綽再舉進士不第後特奏名不合嘗遊舒州太

湖瀟山樂馬自號瀟山叟尤善書其法本二王顏柳

康莊浦

城縣志

杜去輕

杜去輕字端夫有文名吳師道跋端夫墨蹟云此帖

深得山谷老人筆意

章懋蘭  
溪志

黃穎

黃穎字秀實官至中書舍人提點江州太平觀工隸

書

八閩  
通志

張鎡

張鎡字功父清標雅致為時聞人能畫竹石字畫

亦工

圖繪  
寶鑑

潛說友

潛說友字君高縉雲人咸淳中知平江 仙都山銘

潛說友篆書 仙都志

六藝之一錄卷三百四十九